

Partido Movimento Indigena Arubano (MIA):

Stop permanentemente di duna permiso pa hotel, condominio y AirBnB

Dia 22 di April 2024, Partido Movimento Indigena Arubano a keda registra na Electorale Raad. Lider di MIA ta mr. drs. Helena Croes (Hellen). Den un comunicado di prensa, e partido a indica cu nan meta ta pa proteha e derecho di tur Indigena Arubano.

“Nos definicion di ken ta cay bao indigena Arubano ta tur persona cu por demostra cu tin un ancestro f/m naci na Aruba den siglo 18 y/of siglo 19,” a indica den e comunicado. “MIA ta para pa proteccion di nos tera, nos identidad y nos derecho di autodeterminacion.”

Ademas, a informa cu december 2022 congreso di Partido a formula y firma un declaracion den nomber di pueblo Indigena di Aruba y a entrega esaki na VNO. Dia 31 di januari 2023, lider di MIA cu algun miembro di congreso a bolbe entrega e declaracion cu exigencia, pero e biaha aki personalmente na Secretario di Estado Van Huffelen den presencia di rey Willem Alexander. “Nos a haya contesta di gabinete di rey riba



nos declaracion titula ‘Declaracion di Pueblo Indigena Arubano’. Rey a laba man, el a basa su mes riba responsabilidad ministerial. Pe motibo aki nos a lanta MIA,” e partido a indica. “Den nos declaracion nos ta basa nos mes riba tratadonan internacional relaciona cu derechonan di pueblonan indigena.”

Un di e tratadonan aki ta Declaracion di Nacionnan Uni riba Derecho di Pueblonan Indigena. Segun MIA, pueblo autoctono Arubano ta di rasa indjan Caquetio. E colonistanan mayoria di origen Hulandes cu a yega akinan den siglo 18 den transcurso di

añanan a mescla cu e miembronan di e pueblo Caquetio existente akinan. Resultado di e prome censo realisa na 1715 a indica cu tabata biba 393 indjan Caquetio na Aruba. Na 1754 gobernante y colonistanan a haya permiso di WIC pa habita Aruba, e comunicado ta bisa. “Nos ta descendiente di e Caquetionan y e prome Europeonan cu a yega e tempo ey. Den 1827 e asina yama indjannan salbahe (Guajira) a wordo registra; nan tambe a mescla cu e indigenanan di Aruba.

“Nos historia sociocultural t’e punto di salida p’e declara-

cion di Movimento Indigena Arubano. Hulandesnan di WIC a colonisa Aruba sin consentimiento di e habitantenan Indjan cu tabata biba tranquil den tur libertad. Nan a wordo obliga pa traha sin pago; coba pos, traha tranquera, limpia rooinan y core tra’i cabrito. Den 1795 Indjannan a lanta contra tanto abuso y a nenga di sigui traha p’e Hulandesnan. Rebelion indigena a sigui tuma luga te na 1827 ainda.”

Ademas, segun MIA Iglesia Catolico a hunga un rol importante den e represion di pueblo indigena Arubano. “A tene e pueblo abao a base di religion y a spanta pueblo cu dios y fierno.” Na aña 1824 a descubri oro y atrobe pueblo no a haya ningun beneficio, MIA ta lamenta. Pueblo indigena mes no tabata mag di coba oro. Hulandesnan tabata impone castigo di zweep si nan gara un indigena ta coba oro. “Hopi di nos a yega di tende storianan di nos grandinan tocante benanan scondi den mondi. P’esey un di nos exigencianan den nos declaracion ta pa debilbe nos e valor actual di e oro cu a wordo saca te na

1916 fo’i Aruba. Pasobra turcos a tuma luga sin consentimiento di e pueblo original. Pueblo indigena mes no tabatin mucho di bisa.”

Segun MIA, Hulanda a usa e mesun base canonico cu a wordo usa den tur colonia; Doctrina di Descubrimiento. Esaki tin su origen den ley nan canonico Papal di 1493 cu ta bisa cu tur pais cu wordo descubri unda hende no ta profesa e fe Catolico, no tin alma y por wordo subyuga y colonisa.

“Nos di movimiento Indigena Arubano a pone 15 exigencia dirigi na Estado Hulandes y na Rey. Exigencianan ta entre otro: stop di duna paspoort via Aruba; stop permiso di estadia y trabao; derecho riba tur tereno publico cu no ta duna ainda den erfpacht; pago na nos tribu di 1,180 ton di oro na e valor actual; bin cu un BIVA pa tur hotel/Airbnb, Belasting Inheems Volk van Aruba, y un stop permanente pa duna permiso pa traha hotel, condominio, Airbnb pasobra Aruba ta di NOS.”

Santa Rosa a entrega tanki pa scolnan colecta awa pa proyecto di Agroforesteria Sintropico

Manera cu ya ta conoci for di varios luna caba Departamento di Agricultura, Cria y Pesca Santa Rosa hunto cu Living Soil Aruba y ministerio di Transporte, Integridad, Naturalesa y Adulto Mayor a efectua e proyecto di Agroforesteria Sintropico na varios scol cu a haya e nomber crioyo di “Hardin di Alimentacion”.

Un total di 12 scol a ricibi e proyecto aki. Na tur scol e reto di awa ta keda hunga un rol importante, sea debi na falta di sistema pa colecta esaki of tambe pa falta di bari of bakinan pa colecta e awa di airco of yobida. Berdad ta tambe cu ta haci uso di awa di WEB NV pa muha nan cultivo. E meta ta keda si pa purba na mantene e uso di awa di WEB NV abao y ora cu di berdad mester.

Practicamente tur scol y localnan ta dispone di airco. Ta simplemente mester wordo



adapta pa por colecta e awa aki. Locual ta e colectamento di awasero tambe tin su retonan, pero no imposibel pa por realisa.

Durante cu e proyecto di Agro Forestry tabata andando varios docente y cabesantenan involvi tabata boga pa un of otro ayudo pa haya sea bari of tankinan blanco di 1000ltr, yama tambe como IBC Container (Intermediate Bulk Container) pa por cuminsa na colecta awa. Santa Rosa cu ta para pa e

Proyecto aki a duna di conoce den e periodo ey cu na momento di tin e tankinan di 1000ltr aki disponible nos lo informa e scolnan. Claro cu Santa Rosa no ta dispone directamente di e tankinan aki, pero danki na WEB Aruba NV ta haya algun tanki cu nos por facilita e scolnan pa nan Proyecto, cumpliendo cu palabracionnan y sigur na un mihor forma pa cada scol por colecta awa pa nan “Hof di Alimentacion”.

Tankinan di 1000ltr a keda



entrega na algun scol. Pakico algun scol pa motibo cu segun cu Santa Rosa ta ricibi esakinan for di WEB Aruba NV y ta depende di e cantidad cu ta ricibi nos por facilita e scolnan cu dos tanki. Dado caso lo mester bay tuma un tempo atrobe te ora cu tin tanki disponible y cu ricibi nan for di WEB Aruba NV lo por continua cu e otro scolnan cu kisas falta ainda.

Scolnan cu a ricibi e tankinan aki pa cu nan Proyecto di “Hardin di Alimentacion

ta Puis X School, Sint Paulus School, Colegio Santa Filomena, IPA (Instituto Pedagogico Arubano) y Maria College. Tur e scolnan aki a ricibi dos tanki for di Departamento di Agricultura, Cria y Pesca Santa Rosa y WEB Aruba NV. “Nos ta gradici inmensamente WEB Aruba NV pa facilita e tankinan aki cu nos por a reparti pa e scolnan manera menciona. Nos ta hopi sigur cu cada scol lo sa di haci bon uso di e tankinan aki pa nan proyecto.”